



ADMINISTRACIÓN LOCAL

PROVINCIAL

DEPUTACIÓN PROVINCIAL DA CORUÑA

Secretaría Xeral. Sección de Normalización Lingüística

Aprobación das bases XV Premio Rosalía de Castro de Lingua

R.P. 2024/5073 Aprobación das bases XV Premio Rosalía de Castro de Lingua

Por resolución do Presidente da Deputación número 5073 do 12 de febreiro de 2024, aprobáronse as bases reguladoras do XV Premio Rosalía de Castro de Lingua.

En memoria de Rosalía de Castro, coa fin de recoñecer a promoción e dignificación do noso patrimonio lingüístico de forma desinteresada, a Deputación da Coruña convoca a XV edición do premio de acordo coas seguintes bases:

Primeira. Obxectivos

A convocatoria do Premio “Rosalía de Castro” de promoción da lingua galega está destinada a recoñecer iniciativas, traballos recentes, traxectorias de persoas individualmente, colectivos ou entidades comprometidas coa promoción e dignificación social do noso patrimonio lingüístico, quer no ámbito da provincia, quer a nivel galego. Será especialmente significativo o traballo cos sectores de especial relevancia para o futuro do galego.

Poderán presentar candidaturas para a concesión do premio todas as persoas físicas ou xurídicas que estiveren interesadas na promoción da lingua galega. Non se admitirán autocandidaturas e só se admitirá unha candidatura por persoa física ou xurídica.

Nas candidaturas poderán propoñer calquera persoa, entidade ou proxecto que se desenvolvan ou relacionen coa promoción da lingua galega. Poderanse presentar candidaturas doutras edicións que non foran premiadas.

A convocatoria tramitarase de xeito telemático, a través da plataforma de tramitación electrónica da Deputación (SUBTEL).

A presentación telemática producirá plenos efectos xurídicos, sempre que a solicitude sexa presentada dentro do prazo establecido e na plataforma citada. Non se terán por presentadas as solicitudes que se acheguen noutros rexistros.

Dado que a tramitación será telemática:

Quen presente a candidatura deberá dispoñer dun único enderezo electrónico de contacto durante a tramitación do expediente, ao que dirixirán as comunicacións. Excepcionalmente, e de xeito telemático, poderá modificar este enderezo inicial, sempre e cando se lle notifique a circunstancia pertinente á Deputación.

Dispoñer de certificado dixital.

Segunda. Categorías

Os premios concederánselles ás persoas, colectivos ou entidades de ámbito galego en xeral e/ou da provincia da Coruña en particular, que destaquen pola súa traxectoria na promoción e dignificación da lingua galega ou que salienten por actividades que impliquen o espallamento da lingua galega.

Haberá tres categorías:

A) Premio “Rosalía de Castro” de Lingua 2024 á persoa que máis destaque na promoción da lingua galega de calidade e cunha identidade propia e unhas características xenuínas para empregala en todos os ambientes e con todos os estratos sociais.

B) Premio “Rosalía de Castro” de Lingua 2024 á entidade (sexa cal for a súa fórmula xurídica ou modo de constitución: empresas, asociacións, colectivos) que máis destaque na promoción da lingua galega.

C) Premio “Rosalía de Castro” de Lingua 2024 ao proxecto concreto (ferramentas, publicacións/coleccións, portais web...) de dinamización lingüística que realice un traballo específico cos tramos da poboación de menor idade, infancia e mocidade e que atenda espazos emerxentes de uso da lingua co obxectivo de premiar a innovación e o futuro.

Terceira. Premios

Cada categoría está dotada coa cantidade de 5.000 euros, esta cantidade está suxeita ás retencións legais que lle sexan aplicables. O importe dos premios desta convocatoria imputarase á partida 0116/3344/481. As retribucións das persoas integrantes do xurado imputarase á partida 0116/3344/22699 e será o que figura na base 30ª 4. das de execución do Orzamento 2024.

O premio poderá quedar deserto e tamén ser concedido con carácter ex aequo. Neste caso, o seu importe repartirase proporcionalmente entre as persoas e/ou entidades que resultaren premiadas.

Cuarta. Prazo

O prazo de presentación das candidaturas determinarase no anuncio de publicación da convocatoria deste premio no BOP da Coruña, a través da Base de Datos Nacional de Subvencións, e rematará ás **14:00 h do 30 de abril de 2024**.

Quinta. Documentación

A documentación que se ha presentar é a seguinte:

- Memoria explicativa da persoa/entidade/proxecto presentado na que se recollan os méritos que se alegan para a proposta da candidatura, tendo en conta os criterios explicados na base sexta desta convocatoria.

- Documentación acreditativa dos méritos alegados

- Declaración de conformidade da persoa/entidade proposta coa presentación da candidatura na que constarán os seus datos de contacto (nome, NIF, enderezo postal, teléfono, enderezo electrónico e enderezo web) e a identificación da persoa representante para os efectos de aceptar o premio (no caso das entidades educativas poderá ser a persoa directora do centro coa conformidade do claustro).

No caso de persoas xurídicas:

- Acreditación da delegación da Presidencia ou persoa en quen delegue na que se especifique o alcance da delegación (presentación telemática da solicitude e sinatura electrónica de toda a documentación necesaria para a súa tramitación).

Sexta. Xurado

O xurado estará presidido pola persoa que ocupe a presidencia da Deputación ou persoa en quen delegar e formarán parte del catro persoas de recoñecido prestixio no ámbito da lingua galega. As funcións de secretaría exerceraas a secretaria da Corporación, ou funcionaria/o en quen delegar.

A composición do xurado farase pública, con anterioridade á súa reunión, no taboleiro e na páxina web da Deputación (www.dacoruna.gal), co fin de que se poidan interpor, se for o caso, os recursos legais pertinentes.

O xurado actuará en pleno, en sesión a ser posible única, e será necesaria a asistencia da maioría simple dos seus membros. Para os efectos da validez da súa constitución aplicárase o disposto no art. 17.2 da Lei 40/2015, do 1 de outubro, de réxime xurídico do sector público.

As deliberacións serán secretas e delas redactarase a acta correspondente.

Para conceder os premios o xurado terá en conta os seguintes criterios:

Para a categoría A e B

- compromiso firme co uso e coa defensa públicos da lingua e a súa práctica continuada (ata 30 puntos)
- facelo nun ámbito de especial relevancia, proxección ou en que haxa manifestas dificultades por facelo (ata 20 puntos)
- actuacións concretas a favor da dignificación social da lingua galega (ata 10 puntos)
- contribución á galeguización de sectores de especial relevancia económica, social e cultural (ata 15 puntos)

Para a categoría C a estes criterios acrécentanse os seguintes:

- labor dirixido especialmente aos tramos de poboación de menor idade, infancia e/ou mocidade e traballo de promoción da lingua desde a perspectiva da transmisión xeracional (ata 15 puntos)
- que abran novas vías ou que acheguen o galego a novos espazos que irrompen con forza (ata 10 puntos)

De tal xeito que as categorías A e B poden acadar un máximo de 75 puntos e a categoría C un máximo de 100 puntos.

O xurado presentará a súa proposta acompañada do consentimento dos premiados/as ao presidente desta Deputación que é o órgano competente para resolver este premio.

A decisión do xurado terá lugar na segunda metade do mes de maio. Darase a coñecer na páxina web da Deputación e a través dos medios de comunicación.

Sétima. Protección de datos persoais

Os datos facilitados serán tratados pola Deputación da Coruña coa finalidade de tramitar esta convocatoria.

A participación nesta convocatoria implica aceptar a realización de fotografías e/ou vídeos pola Deputación da Coruña no certame de entrega dos premios, que poderán ser publicados na páxina web e perfís en redes sociais da Deputación ou en filmacións/publicacións destinadas á promoción da convocatoria.

A lexitimación para o tratamento dos datos persoais baséase no cumprimento dunha misión de interese público.

Os datos poderán ser comunicados ás Administracións públicas para o exercicio das súas competencias e serán conservados de acordo co establecido na normativa de arquivo.

As persoas interesadas poden exercer os dereitos de acceso, rectificación, supresión, oposición, limitación ao tratamento e portabilidade dos datos a través da sede electrónica da Deputación da Coruña ou presencialmente nos lugares e rexistros establecidos na normativa reguladora do procedemento administrativo común. Así mesmo se considera que o tratamento incumpre co establecido no RXPd pode reclamar perante a AEPD.

Pode consultar máis información relacionada coa protección de datos na nosa [Política de Privacidade](#) ou dirixindo un correo a delegadodeprotecciondedatos@dacoruna.gal.

Oitava

A participación nesta convocatoria supón a total aceptación destas bases.

A Coruña, 12 de febreiro de 2024

O presidente

Valentín González Formoso

A secretaria

Amparo C. Taboada Gil

2024/1094